



Maggy's Tree a habri su segundo negoshi den Boulevard Center ayera. E foto aki ta tuma den e boutique nobo yen di e perfumenan di lo mas ultimo den fragancia y cosmetica di mas moderno. Di r.p.d. ta posa pa e foto Audry Oduber (yiu di propietario), di Puerto Rico, Maria "Coco" Morales, representante di productonan Orlane, Rose van Dijk, Manager di Maggy's Tree y Mireya Lacle (tambe di e familia propietaria). E segundo tienda aki ta situa net e squina di esun prome. Tur dos ta bon surti cu e cosmetica y perfumenan di mas famoso.

Seminario bancario di caribe na Antillas

ORANJESTAD(AAN)—Dialuna a cuminsa un seminario di entrenamiento pa supervisoran di banco di area di Caribe, organiza pa Banco di Antillas Hulandes en cooperacion cu Centro de Estudios monetarios Latinoamericano (CEMLA). Despues di Trinidad, Jamaica y Barbados awor a toca Antillas e honor di organiza e seminario aki.

Docente principal pa e "Fourth Training Program for Bank Examiners" ta Sr. Camilo Arenas, consehero tecnico di Cemla y lo tin ademas algun docente invita tanto local como di exterior cu lo duna charlanan encuanto e topiconan specializa.

Dia prome di november, dia di clausura

di e seminario aki, Dr. Coutney Blackman, Gobernador di Banco Central di Barbados, lo tene un charla cu topico, "Bank Supervision and the National Economy".

E paisnan cu ta tuma parti na e seminario ta Bahamas, Barbados, Sr. Kitts (Eastern Caribbean Central Bank), Haiti, Jamaica, Trinidad and Tobago, y Antillas Hulandes. E seminario ta tuma lugar na Curacao den Holiday Beach Hotel unda e participantenan ta hospeda alavez.

Cu e seminario aki Banco di Antillas Hulandes, Banco Central pues, ta spera di haya ademas di mas conocimiento, un contribucion den estrecha lazonan cu e diferente supervisoran di banco di area di Caribe.

Cruz Corra cu banco di alimento

ORANJESTAD(AAN)—Awe Nacionan Uni ta celebra dia internacional di nutricion y relaciona cu esaki Cruz Corra lo establece un banco di alimento.

Segun presidente di Cruz Corra, Sra. Helen Janssen e banco di alimento ta un plan social educativo pa siña mucha yuda otro nan.

El a muestra cu e caracter social educativo a sali na cla den e situacion

economico cu nos ta aden specialmente. Tin hopi hende, especialmente di sexo femenino cu ta yuda ariba tereno social y mayoria di nan ta di 40 of mas aña y despues di esey ta masha poco hende tin interes pa yuda den comunidad ariba tereno social.

E proyecto ta cu e meta pa stimula mucha den duna yudanza na familiar nan den necesidad.

E banco di alimento ta

cu intencion pa muchanan di schoolnan basico, colecta cuminda pa yuda esnan den necesidad y na mes momento asina duna un servicio social na e comunidad cu nan ta biba aden.

Otro siman tur cabezante di school y comerciantenan y consuladonan lo ricibi carta encuanto e proyecto aki cu aplicacion di e proyecto.

Siñando e muchanan for

Sigui lesa pag. 14

Tin posibilidad cu suma di claim ambiental por wordo reduci

ORANJESTAD(AAN)—Segun Sr. Betico Croes, Aruba tin un claim ambiental legitimo cu ta monta substancialmente y cu Exxon no ta di acuerdo di esaki.

El a laga sa cu si sigui asina, e asunto aki por bay den un procedura juridico cu kizas lo por dura 10 aña. Tanto gobierno di Aruba como Exxon ta interesa pa yega na un acuerdo, y Exxon compromete su mes pa yuda Aruba, trece algun planta den ramo petroquimica pa crea algun cupo di trabao.

Sr. Betico Croes a sigui splica cu no ta necesariamente esaki ta significa cu Exxon ta tene su cartera cera. Por ta menos habri, si Aruba lo mester gana e caminda judicial.

"Nos no ta laga tampoco sin mas pa e caminda judicial cay pa e claim ambiental, pero den esenario pa por yega na un acuerdo, nos ta kere cu si Exxon verdaderamente compromete su mes pa yuda Aruba pone poco planta na Aruba, cu e suma cu nos por a spera for di un caso judicial, lo wordo reduci", sr. Betico Croes a laga sa.

ladronicianan y robonan investiga

ORANJESTAD(AAN)—Dialuna recherchenan tabata tin man yen di casonan cu mester ser investiga.

Na Casa deportivo Mario's e propietario un robo a tuma lugar y e doño a laga sa cu ora cu e cohe inventario e lo bin cu un lista di tur cos cu lo a ser horta.

Na Antilliana de viajes, ladronnan a forza un caha fuerte y no a logra termina cu nan labor di ma-druga manera indicacionnan tabata.

Na Marlboro Ballpark nan a bora un buraco den muraya cu ta dirigi pa e bar pero aparentemente

nan tambe a ser stroba den nan trabao pero tambe cu e muraya tabata duro pa por a bora.

Na informacion di Turismo di Playa Linda tambe ladronnan a bishita pero ta un calculator so nan a bay cune.

Ladron a kibra drenta tambe den deposito di Topcar y aki tampoco por a bisa ainda kico a ser horta te ora cu bini cla cu un lista di inventario.

Na Holiday Inn un turista a laga sa cu ladron a bay cu su tas cu tabata poni den lobby ariba un stoel.

E casonan aki ta den investigacion.

PARFUMS

MAXIM'S

DE
PARIS



NOW AVAILABLE AT

Maggy's 

BLVD. SHOPPING CENTER